



Inatsisartuni ilaasortaq Naaja Nathanielsen, Inuit Ataqatigiit  
TAMASSA

### **Apeqquut nr. 78-imut, Kalaallit Nunaata Aatsitassarsiornermi Aningaasaateqarfia- nut tunngasumut akissut**

Inatsisartut Suleriaasianni § 37 naapertorlugu Naalakkersuisunut makkuningga  
apeqquteqarsimavutit:

*1) Naalakkersuisut isumaqarpat, aatsitassanit isertitat nassuiaataat, tak. Kalaallit  
Nunaata Aatsitassarsiornermi Aningaasaateqarfia pillugu inatsimmi § 3, imm. 3 aamma  
Namminersorneq pillugu inatsimmi § 7 tamakkiisumik imminnut naapertuuttut? Taa-  
maanngippat Naalakkersuisut sukut assigiinngissuteqarnerannik isumaat allaasereq-  
quneqarpoq.*

Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaat  
nr. 6, 5. december 2008-meersumi § 3, imm. 3-mi aalajangersagaq aatsitassanit iserti-  
tanik matuminnga paasisaqarnermik imaqarpoq:

*”Imm. 3. Aatsitassanit isertitaqarnermi paasineqassaaq namminersornerusut Kalaallit  
Nunaanni aatsitassanik misissueqqaarnermi, misissuinermi piiaanermilu isertitat, soorlu  
tamanna Namminersornerusut taamaattunik isertitaqarsinnaatitaanerak pillugu inatsimmi  
eqqartorneqartoq. Aatsitassanit isertitanutaaq ilaapput namminersornerusut aats-  
itassarsiornermik sammisaqarnermi peqataanerannit isertitat, ilaallutik isertitat nammin-  
ersornerusunut tutsinneqartut selskabimi peqataanerme selskabimut atorneqartut, kiisa-  
lu selskabimi piginneqataassutinik tunisinermi namminersornerusut isertitaat.”*

Aatsitassanik inatsisini Kalaallit Nunaata Aatsitassarsiornermi Aningaasaateqarfia pillu-  
gu inatsimmi Kalaallit Nunaanni aatsitassanik misissueqqaarnerup, misissuinerup pi-  
iaanerullu qaqugumulluunniit atuuttussatut inatsisiliorneq pineqarpoq.

Inatsisip akuersissutigineranut piffissami Kalaallit Nunaanni aatsitassanut inatsisaasuni  
atuuttoq tassaasimavoq Kalaallit Nunaanni aatsitassat ikummatissallu pillugit inatsit  
(aatsitassanut inatsit), innersuutigineqarluni inatsimmut nalunaarut nr. 368, 18. juni  
1998-imeersoq. Iseritanut nassuiaat aatsitassanut inatsimmi § 22, imm. 3-mi aalaja-  
ngersarneqarpoq. Kalaallit Nunaanni aatsitassat ikummatissallu pillugit inatsit Aats-  
itassat pillugit ingerlatallu tamatumunnga pingaarutillit pillugit Inatsisartut inatsisaat nr. 7,  
7. december 2009-meersup akuersissutigineratigut atorunnaarsinneqarpoq.

Aatsitassanut inatsisit isertitanik nassuiaataa Namminersornermut inatsimmi § 7, imm.  
2-mi aalajangersakkami ingerlateqqinneqarpoq, tassani isertitat makku Kalaallit  
Nunaanni aatsitassanik suliaqarnernit isertitatut isigineqarnissaat aalajangersar-  
neqarlutik:

5. juni 2013  
Dok. 1223012  
Postboks 1601  
3900 Nuuk  
Tlf. (+299) 34 50 00  
Fax (+299) 32 56 00  
E-mail: isiin@nanoq.gl  
www.nanoq.gl

"1) Atortussianit aatsitassanik misissueqqaarnernik, misissueqqissaarnernik iluaquteqarnernilluunniit akuersissutit aalajangersimasut ataasiakkaat malillugit isertitat, taamaattorli aningaasat Aatsitassanut Ikummatissanullu Pisortaqrifiup aningaasartuutaa-nut matussutissatut akiliutit pinnagit.

2) Danmarkimi aamma Kalaallit Nunaanni akileraarutit isertitat tamarmik, suliffeqarfin-nit Kalaallit Nunaanni atortussiassanit aatsitassarsiornermut tunngasunik pisinnaati-taanermut akuersissutit pigisalinnit pisut.

3) Kalaallit Nunaanni aamma Danmarkimi pisortatut oqartussat ingerlatseqatigiiffinni il. il. Kalaallit Nunaanni aatsitassarsiornermik ingerlataqarnermi piginneqataassuteqarner-mit isertitat.

4) Agguagarsiat akileraarutaanit il. il. isertitanit Danmarkimi aamma Kalaallit Nunaanni ingerlatseqatigiiffinni piginneqataassutilinnit, pisinnaatitaanermut akuersissutit pigisa-linnit, imaluunniit ingerlatseqatigiiffinnit, toqqaannartumik toqqaannanngikaluartumil-luunniit ingerlatseqatigiiffinnik taamaattunik pigisanit, tassannga akileraaruserneqann-gitsunit agguagarsianik pissarsiat."

Taamaattumik Kalaallit Nunaanni Aatsitassarsiornermi Aningaasaateqarfik pillugu inatsimmi § 3, imm. 3 aamma Kalaallit Nunaanni Namminersorneq pillugu inatsimmi § 7 malillugit aatsitassanit isertitanut nassuiaat tamakkiisumik naapertuuttuusoq Naalak-kersuisut isumaqarput.

2) Naalakkersuisut naliliinerat naapertorlugu akileraarutit A-t sulisut aatsitassarsiorfinni Nunatsinni aatsitassarsior-tuni sulinerannut atatillugu akilerneqartut aatsitassanit isertita-nut ilaappat, tak. Kalaallit Nunaata Aatsitassarsiornermi Aningaasaateqarfia pillugu inatsimmi § 3, imm. 3-mut oqaaseqaatit?

Kalaallit Nunaanni Namminersorneq pillugu inatsimmi § 7, imm. 2-mi isertitanik nas-suiaataasuni akileraarutit A-t ilaanngillat, taamaattumillu Kalaallit Nunaanni Aatsitas-sarsiornermi Aningaasaateqarfik pillugu inatsimmi aatsitassanit isertitanut oqaaserisami ilaanatik.

3) Naalakkersuisut isumaqarpat atortut tigussaasut, soorlu uuliakoorneq akiorniarlugu atortut, timersortarfik, imarpik qulaallugu timmisartunut mittarfik, tak. Namminersorneq pillugu inatsimmi § 7 aamma/imaluunniit Aatsitassarsiornermi Aningaasaateqarfik pillugu inatsimmi § 3, imm. 3, aatsitassanit isertitanut ilaassasut, taakkua aatsitassarsioqatigiin-nit IBA-mik isumaqatigiissuteqarnermut atatillugu pissarsiarineqarsimappata allatigu-lluunniit ingerlatseqatigiiffiup misissueqqaarnissamut aatsitassanilluunniit atuinissamut akuersissutaanut ilaappata?

Atortunik tigussaasunik, soorlu uuliakoorneq akiorniarlugu atortunik, timersortarfimmik imaluunniit imarpik qulaallugu timmisartunut mittarfimmik aatsitassarsiornermik inger-latseqatigiiffimmik IBA-mik isumaqatigiissummi piumasaqaatitut pissarsiaqarnissat aal-laaviatigut tassaassapput aatsitassanut inatsit malillugu tigussaasutut akuersissutit najoqqutaralugit isertitat, taamaattumillu namminersornermut inatsimmi § 7, imm. 2-mi isertitanik nassuiaammut ilaassallutik.

4) Apeqqut 3 "aap"-imik akineqarpat, ilisimatitsissutigeqquneqarpoq, taamaappat uulia-koorneq akiorniarlugu atortut Cairniamiit tunniunneqartut nalingat Naalakkersuisut qanoq

*naatsorsorniameraat, tamannalu Nunatta Karsiata 2012-imut naatsorsuutaanni qanoq ersissanersoq?*

Greenland Oil Spill Response A/S-ip pilersinneranut atatillugu uuliakoorneq akiorniarlugu atortut 20 mio. kr.-nut nalilerneqarput. Naliliineq Grønlands Revisionskontor A/S-imit suliarineqarpoq.

Aatsitassarsiorluni sulianit isertitanik naalagaaffimmut naatsorsuutit ukiut tamaasa kingusinnerpaamik 1. septembarimi tunniunneqartassapput, piffissamilu tassani Nunatta Karsiani ukiup siulianut naatsorsuutaasut qangaammalli matuneqareersimasarput.

Taamaattumik Cairnimit uuliakoorneq akiorniarlugu atortut tunniunneqartut nalingat 2012-imut Nunatta Karsiata naatsorsuutaani toqqaannartumik isertitatut ilaanngilaq, taamaattumillu DAU-mi inernerititani ilaanani. Taamaattorli aatsitassarsiornermi isertitanut naalagaaffimmut ukiumoortumi naatsorsuutini ilaatitaavoq, soorlulusooq aatsitassanut inatsimmi § 3, imm. 3 malillugu isertitanut nassuiaatini ilaalluni.

*5) Aatsitassarsiornermi Aningaasaateqarfik pillugu inatsimmi § 50-ip nassatarisaanik ukiuni kingullerni tallimani aatsitassanit isertitat takussutissiaralugit saqqummiuteqquneqarput, ersersillugu aatsitassanit isertitat ukiut tamaasa naatsorsorneqartassasut Nunattalu Karsiata naatsorsuutaanut ilaasassasut.*

Aatsitassarsiorfiusup tiguneqarnera ilutigalugu aatsaat 1. januar 2010-mi Namminersorneq pillugu inatsimmi isertitanik nassuiaat naapertorlugu ukiumoortumik isertitanik kukkunersuiusup uppersagaanik naatsorsuusiortoqartalerpoq. Manna tikillugu 2010-mut aamma 2011-mut naatsorsuusiortoqarpoq. 2010-mi naatsorsuutit taamanikkut Aatsitassanut ikummatissanullu Ataatsimiititaliamut nassiunneqarput, 2011-mulli naatsorsuutit Aningaasaqarnermut Akileraartarnermullu Ataatsimiititaliamut aamma Inuussutisarsiornermut Ataatsimiititaliamut nassiunneqarput, soorlulusooq [www.nanoq.gl](http://www.nanoq.gl)-imut inissinneqarlutik.

2010-mi isertitat 2.940.000 kr.-upput, 2011-mi isertitat 2.195.000 kr.-ullutik. 2012-imut naatsorsuutit suli suliarineqanngillat, kingusinnerpaamillu Namminersorneq pillugu inatsit naapertorlugu 1. september 2013-imut piareersimassallutik.

*6) Nunatta Karsianut kukkunersuiusunit oqaaseqaatini qallunaatuuni qup. 906-imi aatsitassarsiorneq Namminersorneq pillugu inatsisip ilaatut isigalugu aatsitassarsiornermit isertitat katinnerat taamaallaat innersuunneqarput. Naalakkersuisut naliliinerat naapertorlugu, siunissaq eqqarsaatigalugu siunertamut naapertuuttuunerussanerluni aatsitassanit isertitat Nunatta Karsiata naatsorsuutaani immikkuuuanerusunngorlutik suliarineqartalerpata, taamaalilluni Kalaallit Nunaata Aatsitassarsiornermi Aningaasaateqarfia pillugu inatsimmi § 50 piviusunngortinneqarsinnaaleqqullugu?*

Ukiumoortumik – tamanit takuneqarsinnaasutut – naatsorsuutini isertitanut nassuiaat naapertorlugu isertitat qanoq naatsorsorneqartarneri immikkuuuanerusunngorlugit suliarineqartareerput. Suli annertunerusumik immikkuullarinngortitsilluni suliaqartarnissamik pisariaqartitsisoqanngitsoq Naalakkersuisut nalilerpaat.

Apeqquumi § 50-ip isertitanik immikkuuluannerusunnngortitsinikkut piviusunnngortin-  
neqarsinnaasoq pasinarsarneqarpoq. Taamatut pisoqanngilaq.

7) Apeqquut 3 "aap"-imik akineqarpat, uuliakoornertu akiorniarlugu atortut 5 mio. kr sin-  
nerlugit naleqartinneqarpata, aamma Nunatta Karsiata 2012-imut naatsor-suutai  
Inatsisartunut akuerineqarpata, ima paasivara, Kalaallit Nunaata Aatsitassarsiornermi  
Aningaasaateqarfia pillugu inatsit 1. januar 2014 atuutilissasoq. Naalakkersuisut periar-  
fissatut isigavaat, 2014-imut aningaasanut inatsimmi oqaaseqaatitigut imaluunniit 2013-  
imut Tapiissutaasumik aningaa-saliinermut inatsikkut, Aningaasaqarnermut Ataatsimiiti-  
taliap akuersineratigut, Kalaallit Nunaata Aatsitassarsiornermi Aningaasaateqarfia pil-  
lugu inatsisip atuutilernissaanik aalajangersakkami sanioqutitsisinaanermik aalajan-  
gersak-kamik ilanngussisoqarnissaa? Taamaaliornikkut 2014-ip ingerlanerani inatsimmi  
aatsitassanik isertitat nassuiaataannik allannguutissamik akuersinissaq piffissa-  
qarfigineqassagaluarimat, tamatumalu kingorna ingerlassat timitallit aatsitas-  
sarsiornermi aningaasaateqarfimmut atatillugu aatsitassanik isertitanut ilaatin-  
neqassaarlutik.

Kalaallit Nunaanni Aatsitassarsiornermi Aningaasaateqarfimmi § 50-imi aalajangersa-  
gaq imatut oqaasertarpoq:

"§ 50. Inatsisartut inatsisaat atuutilissaaq 1. januar, ukiumi tulluuttumi Inatsisartut  
landskarsip naatsorsuutaannik siullermeerluni akuerinninnerannit, tassani ersersin-  
neqassalluni ukiumi naatsorsuuseriffiusumi Namminersornerusut aatsitassanik isertitaat  
ikinnerpaamik 5 millioner koruuniusimasut.  
Imm. 2. Imm. 1-imi piumasaqaatit eqquutsinneqareerpata inatsisartut inatsisaata atuuti-  
lerfia pillugu Naalakkersuisut nalunaarummik saqqummiussapput."

§ 50-imi aalajangersakkamik allanngineq taamaallaat Kalaallit Nunaanni Aatsitas-  
sarsiornermi Aningaasaateqarfik pillugu Inatsisartut inatsisaannik allannguuteqarnissa-  
mut Inatsisartut inatsisissaattut siunnersuutip akuersissutigineratigut pisinnaavoq. Ka-  
laallit Nunaanni Aatsitassarsiornermi Aningaasaateqarfik pillugu Inatsisartut inatsisaan-  
nik allannguuteqarnissamut Inatsisartut inatsisissaattut siunnersuut siusinnerusukku  
saqqummiussaq, § 37-mi apeqquumi tungavilersuutaasumi naapertuuttuunngitsut  
ilaasa oqaatigineqartut ingalassimaniarnissaannik siunertaqartoq Inatsisartut siullisa  
Inuussutissarsiornermut Ataatsimiititaliaani naammassillugu suliarineqanngilaq, maan-  
nakkullu Inatsisartunut qinersisitsinerup kingornatigut atuukkunnaarsimavoq.

Inussiarnersumik inuulluaqqusilluta

Med venlig hilsen



Jens-Erik Kirkegaard